

## **UMP Lahir Graduan Perintis Program Dwijazah Mekatronik Hasil Kerjasama Dengan HsKA**



Kuantan, 17 Oktober- Majlis Konvokesyen Ke-10 Universiti Malaysia Pahang (UMP) pada kali ini menyaksikan seramai 2,553 graduan yang terdiri daripada 39 Ijazah sarjana kedoktoran, 106 ijazah sarjana, 1510 ijazah sarjana muda dan 873 Diploma bergraduat pada majlis konvokesyen yang akan berlangsung di Dewan Kompleks Sukan Universiti, UMP Kampus Gambang. Konvokesyen kali ini juga mencatatkan seramai 50 orang graduan antarabangsa yang mengikuti pengajian termasuk 7 daripadanya merupakan graduan program prasiswazah.

Lebih membanggakan seramai 10 graduan menerima dua ijazah serentak setelah menamatkan pengajian dwijazah Ijazah Sarjana Muda Mekatronik program HsKA-UMP hari ini. Graduan ini juga menerima ijazah dari Rektor Hochschule Karlsruhe University of Applied Science (HsKA), Prof. Dr. Karl- Heinz Meisel. Mereka adalah Ayuni Mohammad Borhan, Chew Yen Ying, Muhammad Alif Hafizin Abd. Aziz, Muhammad Hafiz Mustapha, Muhammad Redzuan Samad, Nik Mohd. Irfan Nik Mohd. Kamal, Norazmin Ayob, Nuremalina Ahmad Sahrul, Syuhada Syamira Hassan dan Wan Nurul Farah Liyana Razali.

Kebawah Duli Yang Teramat Mulia Tengku Mahkota Pahang, Tengku Abdullah Al-Haj Ibni Sultan Haji Ahmad Shah Al-Musta'in Billah yang merupakan Canselor UMP mencemar duli mengurniakan Ijazah dan anugerah kecemerlangan kepada graduan pada sesi pertama konvokesyen. Hadir dalam majlis Menteri Besar Pahang, Dato Sri Di-Raja Dr. Hj Adnan Haji Yaakob dan Pengurus Lembaga Pengarah Universiti, Dato' Mohd. Hilmey Mohd. Taib dan Naib Canselor UMP, Profesor Dato' Dr. daing Nasir Ibrahim.



Tengku Abdullah bertitah, melewati 13 tahun UMP telah mencapai satu tahap kematangan yang tersendiri berpaksikan bidang-bidang fokus dan kebitaraannya termasuk dalam agenda kesukarelawan, keusahawanan dan pembangunan komuniti.

"Landskap pendidikan tinggi di seluruh dunia sedang berhadapan dengan pelbagai cabaran besar. Justeru UMP perlu memenuhi kehendak dan keperluan sezaman khususnya dalam soal melahirkan modal insan, yang hari ini merupakan kekuatan bagi sesebuah negara di samping meneruskan usaha menjana ilmu demi kepentingan manusia serta mengasuh dan membentuk pemimpin masa depan," titah baginda.

Menurut baginda, sektor pendidikan tinggi adalah faktor kritikal yang seharusnya mampu mentransformasi negara melalui penghasilan modal insan yang berkualiti dan berketerampilan.



Justeru, bagi menentukan Malaysia berjaya muncul menjadi negara maju berpendapatan tinggi dan turut menjadi pemain utama dalam ekonomi global, satu-satunya pilihan ialah menggerak cergas serta menggembangkan seluruh rakyat Malaysia sebagai modal insan negara agar mereka berpotensi, berkemahiran dan berbakat. Selain itu, nisbah rakyat yang berpendidikan tinggi yang lebih besar tentunya menjadi satu daripada faktor yang mencipta kemakmuran dan kesejahteraan negara.

Baginda berbangga dengan kejayaan UMP yang berjaya menerima penarafan Autonomi pada tahun ini dan menyeru pihak Lembaga Pengarah dan Pengurusan Universiti untuk terus mendukung aras akauntabiliti dan pematuhan yang tinggi bagi memastikan kecemerlangan tadbir urus secara lestari dan berintegriti di laksanakan di universiti ini.

Dengan penarafan autonomi ini juga, UMP perlu terus menggiatkan inisiatif bagi mengembangkan karakter globalnya dengan meneroka peluang kerjasama dengan institusi dan organisasi di peringkat dalam dan antarabangsa. Begitu juga dengan keupayaan UMP berkerjasama dengan institusi dan organisasi dalam dan antarabangsa yang berkredibiliti dan berpotensi tinggi sebagaimana yang telah dan sedang dilakukan kini memberi jenama yang besar dan tanda mutu yang tinggi kepada UMP.

Dalam majlis ini Tuanku Canselor mengurniakan Ijazah Kehormat Doktor Falsafah (Kejuruteraan Perniagaan) kepada bekas Duta Besar Jerman di Malaysia, Dr. Günter Gruber yang berperanan besar terhadap kerjasama akademik antarabangsa sehingga termetrainya kolaborasi strategik dengan institusi Jerman Karlsruhe University of Applied Sciences dan Reutlingen University untuk berkerjasama dengan UMP untuk penawaran program dwi-ijazah di peringkat Sarjana Muda dalam Kejuruteraan Mekatronik dan Kejuruteraan Perniagaan sejak enam tahun.

Sementara itu dalam majlis ini seramai 16 orang graduan menerima anugerah kecemerlangan. Graduan Ng Teck Huai dan Mohamad Arif Muahzim dinobatkan penerima Anugerah Pelajaran Diraja (Pingat Jaya Cemerlang), Tan Sok Yee dan Muhamed Yusuf Shahul Hamid menerima Anugerah Canselor dan Ng Eng Khoon serta Ong Pui Jun menerima Anugerah Emas Universiti.



Manakala Anugerah Kecemerlangan Yayasan Pahang diterima Cheah Kar Jun dan Nurul Hafiza Mohamed Aliasrudin serta Anugerah Srikandi Matahari dinobatkan kepada Nurul Nadia Ibrahim. Hadiah Kecemerlangan Hei Tech diterima Sue Qi Jian, Hadiah Kecemerlangan Ir. Ke Book Hee oleh Low Yee Hwa dan Hadiah Kecemerlangan Sapura Industrial Berhad dianugerahkan kepada Nur Afifah Abu Hanifah Lim.

Begitu juga dengan Hadiah Kecemerlangan Telekom Malaysia Berhad dianugerahkan kepada Ahmad Syazwan Zul, Hadiah Kecemerlangan Perodua oleh Tan Shy Ching Hadiah Kecemerlangan Petronas Penapisan (Terengganu) Sdn. Bhd oleh Low Wai Mun dan Hadiah Harapan Kimia Industri dianugerahkan kepada Nurul Huda Ramly.

**Disediakan Unit Perhubungan Awam, Bahagian Komunikasi Korporat PNC**